

摘藻堂四庫全書薈要

集部

欽定四庫全書薈要卷二萬四百七十六

集部

明詩綜卷三

翰林院檢討朱彝尊編

劉基一百四首

基字伯溫青田人元進士洪武初官至御史中丞論佐命功封誠意伯為胡惟庸毒死正德中

追謚文成有覆瓿集犁眉公集

楊維新云子房不見詞章玄齡

僅辨符檄公勲業造邦文章名世可謂千古人豪
徐子元云青田鈞天廣樂聲容不凡開國

宗工不在茲乎 陳彝仲云洪武間高侍郎先
鳴文成次之固已咀其精華窺其堂與 王元

美云劉伯溫如劉宋好武諸王事力既稱服藝
華整見王謝衣冠子弟不免低眉又云明興立

赤幟者二家而已才情之美無過季迪聲容之
壯次及伯溫當是時孟載景文子高輩實為之

羽翼而談者尚以元習短之謂辭美於宋所乏
老蒼格不及唐僅窺季晚然是二三君子工力

深重風調諧美不得中行猶稱殆庶翩翩一時
之選也 穆敬甫云劉公詩如乘風載響音藏

遠播 胡元瑞云青田才情不若楊孟載氣骨
稍減汪忠勤以較張徐諸子不妨上座 何穉

孝云伯溫詩沿元習其精者學韓退之 蔣仲
舒云劉詩如河朔少年充悅忼健 陳卧子云

文成雅辭雋旨微傷婉弱令人思留侯之貌
王介人云文成詩體純正較之四傑雖縱橫少

遜而似覺寡疵 陸冰脩云伯溫早見知於虞
道園道園稱其詩云發感慨於情性之正存憂
患於敦厚之言是不可及若其體製音韻無媿
盛唐其推獎至矣特不與楊廉夫顧仲瑛輩結
詩酒之社然視四傑十友皆後進也 沈山子
云誠意樂府古詩勝近體覆瓿集勝犁眉公集
固當與季迪爭長並驅王元美以劉次於高胡
元瑞以劉為高之羽翼要非篤論至何仲默以
袁景文為明初詩人之冠則置二公於何地乎
鍾廣漢云文成論詩謂今天下為詩者取則
於達官貴人而不師古此語深中元人之病試
讀公集中詩皆有古人之一體可謂善於師古
者也

靜志居詩話樂府辭自唐以前詩人多擬之至
宋而埽除殆盡元季楊廉夫李季和輩交相唱

荅然多構新題為古體惟劉誠意銳意摹古所
作特多遂開明三百年風氣其五言古詩專仿
韋左司要其神詣與相伯仲諸體均純正無疵
若二鬼一篇直欲破劉叉之膽矣公在元時有
和王文明絕句云夜涼月白西湖水坐看三台
上將星好事者遂傳會之謂公望西湖雲氣語
坐客云後十年有帝者起吾當輔之此妄也當
公羈管紹興時感情至欲自殺藉門人穆爾薩
抱持得不死明初既定婺州猶佐舒穆魯宜孫拒
守即其酬和詩句如中夜登高樓遙瞻太微座
衆星各參差威弧何時正鴻鴈西北來安能從
之飛周旋不恤緯楚放常懷闕却秦慕魯連存
齊想田單蓋未嘗終食忘大都也是豈預自負
身為佐命者邪其題太公釣渭圖云偶應飛熊
兆尊為帝者師則公自道也世人多以前知目
公至凡緯識堪與若披肝露膽等書皆指為公

作豈其
然乎

思美人

雨欲來風蕭蕭披桂枝拂陵苔繇英隕鮮葉飄揚煙埃
靡招搖激房帷發綺綃中髮膚慙寂寥思美人隔青霄
水渺茫山岑崯雲中鳥何脩脩欲寄書天路遙東逝川
不可要芳蘭華日夜彫掩瑤琴閒玉簫魂累累心搖搖
望明月歌且謠聊逍遙永今宵

顧玄言云
出入騷雅

寒夜謠

今夕何夕歲聿其徂草木彫落山川縈紆瞻彼鴻鴈拂
翼天衢離離和鳴載悠載徐雖無羽翰心與之俱華月
出雲青燈在隅歌以寫懷云何其盱

秋懷

嚶嚶草蟲慄慄其股歲暮如何爾獨良苦瞻望日月縣
絲我愁如彼逝矢一往不留嗟爾小子時不再得匪緡
曷魚不藝胡稷蕭蕭草蟲烈烈其音歲暮何為祇攪我
心

思歸引

山高高兮可以望四方胡躋爾巔兮不見我故鄉歲云暮兮無衣裳車罷馬羸兮僕夫頓僵水有蛟鱷兮陸有虎狼吁嗟奈何兮惟懷永傷

牆上難為趨行

弱水不可以航石林不可以車人生貴守分牆上難為趨茫茫八極內狹徑交通衢紛紛皆轍迹擾擾論鎗銖焦原詫齊踵龍頷夸探珠片言取卿相杯酒興剪屠機

事一朝露妻子化為魚林間有一士蓬蒿翳窮廬種稻
十數畝種桑八九株有酒且飲之無事即安居孰知五
鼎食聊保百年軀悠悠身後事汲汲復何如

夜夜曲

冬夜恒苦長夏夜恒苦短短長相蔽虧殷勤望推輓
紉茅作繩繩易斷汲水作池池易旱故鏡塵昏難遠照
故衣絮敝無新暖西風嫋嫋吹桂枝白露點苔黃葉滿

東飛伯勞歌

南飛鷓鴣北飛鵲黃昏鷄鳴白日燭珊瑚石上栽兔絲
鴛鴦獨宿枯桑枝永夜涼蟾入羅幕蟬翼不如秋鬢薄
寒塘露蓮千葉紅可憐零落空隨風

走馬引

天冥冥雨濛濛當天白日中貫虹壯士拔劍出門去手
提仇頭擲草中擲草中血漉漉追兵夜至深谷伏精誠
感天天心哀太一乃遣天馬從天來揮霍雷電揚風埃
壯士呼天馬馳橫行白晝吏不敢窺戴天之恥自古有

必報天地亦與相扶持夫差徒能不忘而報越棲於會稽又縱之始知壯士獨無媿魯莊何以為人為

長安道

長安道送盡芳菲到枯槁人生哀盛苦不嘗何異長安道旁草漢家將軍初拜官門前上客車班班一朝勢衰煙燄歇車輪無聲馬蹄絕明年有詔封冠軍依舊車馬來如雲

鳴鴈行

雖雖鳴鴈鳴達旦舉翼相連拂雲漢平原漠漠生野煙
鴈飛只向江南天江南十月多禾黍一半輸官半供汝
明年二月歸養雛雛成又望江南去

隔谷歌

戰鼓咽悲風弓折不可把弟兄隔谷不相聞咫尺人間
與泉下丈夫誓許國殺身非所憐兩心本一氣何能坐
相捐登埤四顧望慷慨肝膽裂不見救兵來但見繞城
鐵甲光如雪飛禽在羅網尚或念其饑身為高官馬食

粟忍見手足居重圍相彼鴻與鴈亦各顧匹儔挽弓射
一援羣援拔箭聲啾啾鳥獸且有情人心獨何尤嗚呼
田家紫荆雖微木不忍聽君歌隔谷

冬暖行

孟冬十月暖桃李花盛開蝴蝶草間出飛上花枝來蝶
知愛花為花出不知冬暖無多日霜風一夕花作塵墜
粉飄黃愁殺人

築城詞

君不見杭州無城賊直入台州有城賊不入重門擊柝
自古來而況四郊多警急愚民莫可與慮始見說築城
俱不喜一朝城成不可踰挈家却向城中居寄語築城
人城高固自好更須足食仍足兵不然劒閣潼關且難
保獨不念至元延祐年天下無城亦無盜

畦桑詞

編竹為籬更栽刺高門大寫畦桑字縣官要備六事忙
村村巷巷催畦桑桑畦有增不可減準備上司來計點

新官下馬舊官行牌上却改新官名君不見古人樹桑
在牆下五十衣帛無凍者今日路旁桑滿畦茅屋苦寒
中夜啼

瑯琊王歌

駿馬須好鞍強弓須勁箭將軍不知兵健兒空自健

薤露歌

人生無百歲百歲復如何古來英雄士各已歸山阿

鍾廣

漢云音韻悲涼初讀
之嗚咽再讀之慷慨

懊懷歌

白鴉養雛時夜夜啼達曙如何羽翼成各自東西去

宗子

相云古
韻淒調

玉階怨

長門燈下淚滴作玉階苔年年傍春雨一上苑牆來

長門怨

白露下玉除風清月如練坐看池上螢飛入昭陽殿

宗子

相云不作怨
語怨已自深

感懷四首

驅車出門去四顧不見人回風卷落葉颯颯帶沙塵平
原曠千里莽莽盡荆榛華能幾何憔悴及茲辰所以
芳桂枝不爭桃李春雲林耿幽獨霜雪空相親

啾啾草間雀日隨黃口飛爭先赴稻梁寧顧野人機便
善柔子懷利近相依但慕春蒐好不見秋霜霏驅車
逐走鹿中路忘所歸豈不愛其躬天命與心違古道今
已矣感寤空涕歔

結髮事遠遊逍遙觀四方天地一何闊山川杳茫茫衆
鳥各自飛喬木空蒼涼登高見萬里懷古使心傷竚立
望浮雲安得凌風翔

槁葉寒撼撼羅帳秋風生悽悽候蟲鳴嘒嘒賓鴻驚美
人抱瑤瑟仰視河漢明絲桐豈殊音古調非今聲沈思
空幽寂歲月已徂征

感時述事

八首

十羊煩九牧自古貽笑嗤任賢苟不貳焉用多人為師

行仰供給州縣方告疲差徭逮所歷添官有權宜奈何
乘此勢爭先植其私百司竝效尤貨賄縱橫飛列坐隘
公堂號令紛披離名稱到輿隸混雜無尊卑正官反差
出道路不停馳徇祿積日月官吏之所希此輩欲何求
朶剥圖身肥世皇一宇宙四海均惠慈盜賊乘間發咎
實由官司云何未悔禍救焚用膏脂姻婭遂連茹公介
棄草茨農郊日增壘良民死無期天關深虎豹欲語當
因誰

先王制民產曷分兵與農三時事耕稼閱武在嚴冬亂
略齊憤疾戰伐厥有庸那令異編籍自使殊心胸坐食
不知恩怙勢含威兇將官用世襲生長值時雍豈惟昧
韜畧且不習擊剗悍卒等驕子有令亦無從跳踉恣豪
橫鼓氣陵愚憊所以喪紀律安能當賊鋒崩騰去部曲
蟻合尋歸蹤時方務姑息枉法稱寬容寧知養豺虎反
噬中自鍾國家立制度恃此為垣墉積弊有根源終成
腸肺癰何由復古道一視均堯封

豢狗不噬禦星馳募民兵民兵盡烏合何以壯干城百
姓雖云庶教養素無行譬彼原上草自死還自生安知
狗犬義捐命為父兄利財求應召早懷逃竄情出門即
剽掠所過沸如羹總戎無節制顛倒迷章程威權付便
嬖賞罰昧公平饑寒莫與恤銳挫怨乃萌見賊不須多
奔潰土瓦傾旌旗委曲野鳥雀噪空營將軍與左右相
顧但目瞠此事已習慣智巧莫能爭廟堂忽遠算胸次
猜疑并豈乏計策士用之非至誠德威兩不立何以御

羣氓慷慨思古人惻愴淚霑纓

五谿舊三苗蛇虺相雜處其人近禽獸巢穴依險阻起居任情欲鬪狠競爪距未能識君臣且不顧于父所以稱為凶分北勞舜禹先朝慎羈縻罔俾來中土胡為倏而至馳驟如風雨見賊但超超逢民輒俘虜腰纏皆金銀衣被俱繡組所過惡少年改服投其伍農家劫掠盡何人種禾黍盜賊有根源厥咎由官府任將匪能賢敗衄乃自取奇材何代無推誠即心膂誰哉倡此計延寇

入堂宇割鼻救眼睛於身竟奚補浙西耕桑地百載安
生聚自從甲兵興徵斂空抽杼疲氓真可憐忍令餉豺
虎追憶至元年憂來傷肺腑

虞刑論小過夏摭殄渠魁好生雖大德縱惡非聖裁官
吏逞貪婪樹怨結禍胎法當究其源剪鉏去根荄蒙龍
曲全宥駕患於後來濫觴不堙塞滔天谷陵頽總戎用
高官沐猴戴母顏玉帳飲酒肉士卒食菜藿未戰已離
心望風遂崩摧招安乃倡議和者聲如雷天高豹關遠

日月照不該俱曰賊有神討之則蒙災大臣怨及已相
視若銜枚阿諛就姑息華紱被死灰姦宄爭效尤無風
自揚埃嘯聚逞強力謂是爵祿媒黎民亦何辜骨肉散
草萊傾家事守禦反以結嫌猜慟哭浮雲黑悲風為徘徊
赤子母不憐不如絕其胚養梟逐鳳皇此事天所哀
胡為尚靡定顛倒脛與頤春秋戒肆眚念此良悠哉
八政首食貨錢幣通有無國朝幣用楮流行比金珠至
今垂百年轉布彌寰區此物豈足貴實由威令敷廟堂

喜新政躁議違老夫悠悠祖宗訓變之在朝瞞瞿然駭
羣目疑怪仍挪揄至寶惟艱得韞櫝斯藏諸假令多若
土賤棄復誰沽錢幣相比較好醜天然殊譬彼絺與綌
長短價相如互市從所取孰肯要其疵此理實易解無
用論智愚矧茲四海內五載橫戈及赤子投枳棘不知
所歸塗一口當萬喙脣縮舌亦瘖導水必尋源源達流
乃疏藝木必培根根固葉不枯慎勿庸邇言揚火自焚
軀尚克詰戎兵丕顯厥祖謨

惟民食為命王政之所先海嶠實天產厥利何可專貪
臣務聚財張羅密於疆厲禁及魚鰕鹵水不得煎出門
即陷阱舉足遭纏牽魚休用鞭箠寃痛聲相連高牙開
怨府積貨重姦權分攤算戶口滲漉盡微涓官征勢既
迫私販理則然遂令無賴兒睚眦操戈鋌出沒山谷裏
陸梁江海邊橫行荷簞籠方駕列船舫拒捕斥後懦爭
彊夸直前盜賊由此起狼籍成蔓延先王務廣德如川
出深淵外本而內末民俗隨之遷自從甲兵興奄忽五

六年借籌計得喪耗費倍萬千回憶至元初禁網疎且
平家家有衣食畏刑思保全後來法轉細百體皆拘攣
厚利入私家官府任其愆大哉乃祖訓典章尚流傳有
舉斯可復庶用康迺邇

秦王縣九宇三代法乃變漢祖都咸陽一統制荒甸豪
雄既鏟削瘡痍獲休宴文皇繼鴻業垂拱未央殿累歲
減田租頻年賜縑絹太倉積陳紅圜府朽貫線是時江
南粟未盡輸赤縣方今貢賦區兩際日月寔胡為倚東

吳轉餉給豐饍徑危冒不測勢與蛟龍戰遂令鯨與鯢
掉尾乘利便扼吭要國寵金紫被下賤忠良怒切齒姦
宄競攀援包羞屈政典尾大不可轉聖人別九州田賦
揚為殿中原一何膺所務非所先豳風重稼穡王業丘
山奠夫征厲末習孰敢事游燕哀哉罔稽古生齒徒蕃
羨一羹而食十何以奉征繕長歌寄愁思涕淚如流霰

程孟陽云感時諸詩可謂
詩史追配杜老邁元白矣

旅興 十四首

秋氣肅萬物百蟲競號鳴蟋蟀最可憐切切悲其生屢
履步庭除素月員且明翫之不可掇渺焉忽西傾回身
掩房闥愴怛煩慮盈太息以終宵展轉難為情

窮巷屏人跡開門見青山青山似故鄉客子何當還蟋
蟀日夜鳴綠樹亦已殷白日駛西征浮雲不可攀安得
生羽翼奮飛出玄間

雨來羣山暗雨過羣山明山明猿鳥喜山暗猿鳥驚歲
暮陰風起白日西南傾寒蟬枝上號阜螽草間鳴人生

非草木能無感中情

別離多苦懷三年當百載來者非所知往者今安在浮
雲旦夕起白日墮光彩天地亦有形豈能長不改

忡忡坐虛室曖曖日向暮空煙斂曾岑暝色半高樹緬
邈起遐思逍遙散輕步嬋娟天上月的皦草間露物情
豈異昔人事殊非故芳歲不可淹哀年況多慮諒無彭
鏗術頽齡那能駐

人生如浮雲聚散無定期驚風一飄蕩各自東西之粲

粲陵苔花淒淒寒露時浮雲不可駐顧盼空齋咨

青青瀟湘竹漪漪被寒水遊子如飛蓬佳人曠千里登
高左右望但見黃塵起鳳皇翔不下梧桐化為枳傷懷
不可道憂念何時已

吾觀穹壤間萬變皆有窮何如順天道原始以知終清
晨攬衣起締綌生秋風雖雖鳴鴈來灼灼酸棗紅悵焉
念所思悲感集予衷佳期在何許瑤草成枯蓬佇立望
日月勞心極慙慙

烏鳴朝啞啞鵲鳴暮啾啾聞鵲既不喜聞烏復何憂世
人務苟得君子絕外求滄浪迅風波無風即安流胡為
自冰炭以貽達者羞

寒燈耿幽幕蟲鳴清夜闌起行望青天明月在雲端美
人隔千里山河杳漫漫玄雲翳崇岡白露凋芳蘭願以
綠綺琴寫作行路難憂來無和聲絃絕空長歎

泊舟嚴子瀨遙望仙華山中有騎羊人皓齒頰玉顏餐
霞飲沆瀣坐石濯潺湲長嘯起天風落日為之還悠悠

隔雲雨杳杳不可攀

日落天氣涼逍遙步庭墀蟋蟀已在宇鴻鴈來何遲少
壯輕遠遊衰老傷別離念我親與友各在天一涯音容
兩契濶悲歡絕相知鍛羽懷舊林葺鱗思故池百年能
幾何逝者無還期俛仰增感歎有懷當語誰殷勤託宵
夢聊用慰所思

久旱草不生一雨青滿地新萋與舊枿好醜各自媚
啗黃鶯吟習習元鳥至閒庭人跡稀白日澹清氣平生

孟公綽庶足無妄覲但願長若斯撥置身外事

秋高潦水涸旻天亦淒清枯籜響悲音羈蟲振餘聲
曠落日暉慘慘游子情風林無定枝馳車鮮安旌
自媿匪賢達默默嗟其生

遣興

避地適他鄉息肩謝羈束生事未有涯暫止聊自足
南園實清曠可以永幽獨曾樓面羣山俯見湖水綠
雜英被郊甸魚鳥得棲宿登臨且慰意未暇計遠躅
聖賢有

遺訓知命夫何卜

琴清堂詩

亭亭嶧陽桐斲為綠綺琴絃彈我白雪音虛
堂夜迢迢華月耿疎林鳳皇天上來蚪龍水中吟曲罷
起太息無人知此心

周青中云
神似蘇州

晚同方舟上人登師子巖作

落日下前峰輕煙生遠林雲霞媚餘姿松柏澹清陰振
策縱幽步披榛陟層岑槿花籬上明莎雞草間吟涼風

自西來颼颼吹我襟榮華能幾時搖落方自今逝川無
停波急絃有哀音顧瞻望四方悵焉愁思深

謝茂秦云
逸韻颼舉

幽思
泉發

新春

昨夜東風來吹我門前柳柳芽黃未全草根青已有鵲
鳩屋上鳴勸我嘗春酒我髮日已白我顏日已醜開尊
聊怡情誰能計身後

和舒穆魯公得令字

勾芒發陳根北斗轉東柄衆星各參差威弧何時正好
生雖聖心明刑亦王政哲人慎謀始斯焉獲終慶徒言
兩階舞可以懷逆命不見三危山萬里竄梟獍世德異
唐虞民情好爭競那無跗扁醫尚有膏肓病波濤地軸
輒虎豹天關夏雨露當春滋風霜及秋勁誰能奉明王
順天行號令

送布延子壽赴廣西憲幕

離維荆衡南迤邐走蠻徼民風雜徭蜚地勢帶蒙詔迨

迨商周前風水絕纖竅後王務廣土懷柔倚攻剽羈縻
非本情疲疴復誰療大明侔日月幽裔靡不照化育之
所加欣榮及蓬藿憲府僉百司選擇自廊廟偏方異習
俗賦性實同調培養自殊塗激揚貴知要願言崇令業
以繼南國名

望武夷山作

飲馬九曲溪遙望武夷峰長林抱迴合丹厓造空濛浮
暉澹寒翠水木皆曼容薄游限塵務促景尼奇蹤緬懷

紫陽子千載誰與同瓊佩邈煙霧石函閤遺封羈猿怨
幽澗飛蘿冒芳叢瑤琴空流泉桂枝徒秋風悵望佳期
阻纏綿憂思重殷勤尺素書願寄雲間鴻

早發建寧至興田驛

鷄鳴戒晨裝上馬見初日露泣葉尚俯霧重山未出客
塗得霽景緩步非縱佚矧茲歲有秋高下俱穎粟牛羊
散原野鵝鴨滿阡術懷抱既夷曠神情自清謐寒花蔓
籬落候蟲響蒙密霞標首楓林雪綻烏臼實幽覽雖云

遽佳趣領已悉我行固無期況乃塵事畢

自衢州至蘭溪

秋郊斂微雨霽色澄人心振策率廣路逍遙散煩襟疎
煙帶平原薄雲去高岑湛湛水凝碧離離稻垂金薺麥
霜始秀元蟬寒更吟幽懷耿虛寂好景自相尋心契清
川流目翫嘉樹林歌傳滄浪調曲繼白雪音仙山在咫尺
早晚期登臨

壬辰歲八月自台州之永嘉度蒼嶺

昨暮辭赤城今朝度蒼嶺山峻路屈盤峽東迷晷景豁
豁出風門坎窞入天井冥行九地底高闕羣木頂瀑泉
流其中礮若洩溟滓哀猿嘯無外去鳥飛更永僕夫怨
跋涉瘦馬悲項領盜賊追天誅平人遘災眚佇立盼嶽
岑心亂難為整

夢草堂遣懷

卽事在自得強歌非正音所以春草句聲價重兼金若
人千載下遺響邈難尋淒涼一池塘賴爾得至今我來

當杪秋天淨橫潦沈枯荷有餘馨哀柳無殘陰鼓輦響
未已山水意徒深感時念兄弟惻愴傷我心

在永嘉作

高屋集飛雨蕭條生早寒我來復幾時明月缺已團浮
雲蔽青天山川杳漫漫狐狸嘯悲風鯨鯢噴重瀾孤鴈
號南飛音聲淒以酸顧瞻望桑梓慷慨起長歎願欲凌
風翔惜哉無羽翰中夜百感生展轉不遑安枯荷響西
池槁葉鳴林端寥寥天宇空冉冉時節闌舉俗愛文身

誰識章甫冠河流未到海平陸皆驚湍旗幟滿山澤鳴呼行路難

晨詣祥符寺

上馬鷄始鳴入寺鐘未歇草際起微風林端澹斜月僧房湛幽寂假寐待明發松徑斷無人經聲在清樾

登安仁驛

鷄鳴發山驛天黑路彌險煙樹出猿聲風枝落螢點正秋氣轉炎嶂濕雲難斂佇立山雨來客愁紛冉冉

題山水圖

江上何所有，高低千萬峰。
結廬覆以茅，取足聊自容。
綠樹既蓊鬱，清溪亦溶溶。
地僻無車馬，猿鳥多相從。
日落沙際明，寒煙澹疎松。
蒼茫雲霞外，隱見青芙蓉。
悠然一舸還，好景時獨逢。
歸來山月出，古剎鳴昏鐘。

別峰和尚方丈題唐子華山陰圖

連山走坡陀，大谷入晻曖。
屋藏深樹中，路出巨石背。
煙雨時有無，澗壑互顯晦。
輕曳飛綃縹，縹緲沃浮黛。
雄梁

矯脩鼉駢壁鮫文瑤崢嶸紫霞高屈曲白水匯陰森神
鬼宅奮迅龍馬隊風雲氣象寬日月光炯碎借問此何
鄉或有捐余佩荅云越山陰信美無與對自從永和來
燕游推勝槩佳人去不還盛集嗟未再唐令實好奇掇
拾歸畫繪上人遠公徒我亦淵明輩會晤屬時艱觀覽
增慷慨故園沒灌莽舉足蛇豕礙放歌自太息激烈驚
厚載

寄江西黃伯善兄弟

我思美人乃在洞庭之陽彭蠡之陰衝波亘天三百里
離恨比之應更深揚瀾咆哮左蠡怒白日慘慘元猿吟
欲往從之憤余心鼃鼃脆脆不可以駕風擬擬兮雨淫
淫望厭原之飛煙邈匡廬之高岑虹旌兮翠羽容兮
鳳皇舞菽衣兮萑襟玉笙吹兮紫鸞音望不見兮悲莫
任

徐資生華山圖歌

華嶽插天七千丈丹崖翠壁開仙掌壁間擘出黃河流

大禹以之分九州河流衮衮赴溟漲華嶽拔出天河上
雲宮霧窟疑本無石室金臺儼相向玉泉高通玉井津
中有蓮實如車輪世人肉食未羽化可望不得聊相親
高堂晚晴圖畫展眼明一見心目遠世間塵土今紛紛
吾當拂衣卧山雲

夏夜台州城中作

江上火雲蒸熱風欲雨不雨天夢夢良田半作龜兆坼
秔稻日夕成蒿蓬去年海賊殺元帥黎民星散劫火紅

耕牛剥皮作戰具鉏犁化盡刀劍鋒農夫有田不得種
白日慘澹衡茅空將軍虎毛深玉帳野哭不入轅門中
健兒鬪死烏自食何人幕下矜奇功今年大軍蕩淮甸
分命上宰麾元戎舞干再見有苗格山川鬼神當效忠
何為旱魃還肆虐坐令毒沴傷和沖傳聞逆黨尚攻剽
所過丘壟皆成童閭司恐懼破和議斥堠悉罷雲邊烽
殺降共說有大禁無人更敢彎弧弓山中悲啼海中笑
蜃氣繞日生長虹古時東海辟孝婦草木枯瘁連三冬

六月降霜良有以天公未必長瘖聾只今幅員廣無外
東至日出西太蒙一民一物吾肺腑仁者自是哀癯痼
養臬殪鳳天所厭誰能抗疏回宸衷夜涼木末挂河漢
海嶠月出光玲瓏仰視皇天轉北斗嗚呼愁歎何時終
陳彥德以畫見贈詩以酬之

君不見昔日米南宮又不見今時趙學士能將翰墨爭
鬼工天下流傳名父子括蒼處士身姓陳小郎英俊尤
可人欲收大地入掌握筆意所到如有神曉移小幅來

贈我紅日滿窓花婀娜開軒展視心眼寬如在岳陽樓
上坐湖波吹煙入遠山君山乃在湖中間蒼梧九疑隔
湘浦孤雲目斷幽篁斑漁舟一葉來何處巫峽雨昏啼
鳩暮澤畔行人久不歸沙上輕鷗自飛去陳公子聽我
歌深林大谷龍蛇多蓬萊三島可避世欲往其奈風濤
何

題富好禮所畜村樂圖

我昔住在南山頭連山下帶清溪幽山巔出泉宜種稻

繞屋盡是良田疇家家種田恥商販有足嬾踏縣與州

西風八月淋潦盡稻穗擲比無蝗蟲黃雞長大白鴨重

瓦甕琥珀香新筍芋魁如拳栗殼赤獻罷地主還相酬

東鄰西舍迭賓主老幼合坐意綢繆山花野葉插巾帽

竹箸漆椀兼甕甌酒酣大笑雜語謔跪拜交錯禮數稠

或起頻足舞侏儒或坐拍手歌甌篋傾盆倒榼混醢醬

爛熳霑清方未休兒童跳躍坐誼譟執遁逐走同俘囚

出門不記舍前路顛倒扶掖迷去留朝陽照屋且熟睡

官府亦簡少所求寧知宴安含酖毒未耜一變成戈矛
高門大宅化灰燼蓬蒿瓦礫塞道周春燕營巢在林木
深山露宿隨猿猴三年避亂客異縣側身天地如浮漚
親朋阻隔童僕散疏食水飲不自謀有時惆悵夢閭里
驚覺五內攢百憂君家畫圖稱絕妙鑒別曾遇柯丹丘
想應臨搦出祕府筆意精到世罕儔村歌社舞自真率
何用廣樂張公侯太平氣象忽在眼令我感愴涕淚流
近者鄉人來報喜今歲高下俱有秋豺狼食飽卧窟穴

軍師已運招安籌人情自古共懷土況乃霜雨淒松楸
神龜且被豫且困予所勿念天我尤積薪厝火非遠計
誰能獻納陳嘉猷長江波浪接淮泗白日慘澹騰蛟蚪
天下農夫總供給隴畝不得安鉏耰市中食物貴百倍
一豕之價過於牛魚鹽菜果悉買米官幣束閣若贅瘤
朝餐僅了愁夕膳誰復有酒澆其喉循環天運往必復
邪氣暫至不遠瘳此生此景須再覩引領悵望心悠悠

寄宋景濂

我思美人乃在仙華之山山前夜半挂河漢天津兩旗
俯可攀我欲從之阻河關初平不來白羊死瘦骨蝕盡
莓苔頑風沙蕭蕭隔人間玄霜日夕凋玉顏有鳥有鳥
丁令威側身下上空孤飛女媧石墜黿脚折海水散作
雲霏霏山中有奇樹一華一千秋美人何不折寄我使
我歎恨長凝眸深沈洞谷山鬼集陰氣六月冰霜留嗟
哉美人誰與儔明年定約赤松子與爾羣峰頂上遊

二鬼

憶昔盤古初開天地時以土為肉石為骨水為血脈天
為皮崑崙為頭顱江海為胃腸嵩嶽為背脊其外四岳
為四肢四肢百體咸定位乃以日月為兩眼循環照燭
三百六十骨節八萬四千毛竅勿使淫邪發洩生瘡痍
兩眼相逐走不歇天帝愍其勞逸不調生病患申命守
以兩鬼名曰結璘與鬱儀鬱儀手捉三足老鴉脚踏
火輪蟠九螭咀嚼五色若木英身上五色光陸離朝發
暘谷暮金樞清晨還上扶桑枝揚鞭驅龍扶海若蒸霞

沸浪煎魚龜輝煌焜耀啟幽暗燠煦草木生芳蕤結璘
坐在廣寒桂樹根漱嚙桂露芬香菲啖服白兔所擣之
靈藥跳上蟾蜍背脊騎拍光弄影蕩雲漢閃奎爍壁葩
花摘手摘桂樹子撒入大海中散與蚌蛤為珠璣或落
巖谷間化作珣玕琪人拾得喫者胸臆生明暈内外星
官各職職惟有兩鬼兩眼晝夜長相追有物來掩犯兩
鬼隨即揮刀鉞禁制蝦蟇與老鴉低頭屏氣服役使不
敢起意為姦欺天帝憐兩鬼暫放兩鬼人間娛一鬼乘

白狗走向織女黃姑機槌河鼓塞兩旗跳下黃初平牧
羊羣烹羊食肉口吻流膏脂却入天台山呼龍喚虎聽
指麾東巖鑿石取金卯西巖掘土求瓊歲巖訔洞砉石
梁折驚起五百羅漢半夜撥刺衝天飛一鬼乘白豕從
以青羊青兔赤鼠兒便從閤道出西清入少微浴咸池
身騎青田鶴去採青田芝仙都赤城三十六洞主騎鸞
翳鳳來陪隨神魁清唱毛女和長煙裊裊飄熊旂蜚廉
吹笙虎擊筑罔象出舞奔馮夷兩鬼自從天上別別後

道路阻隔不得相聞知忽聞寒山子往來說因依兩鬼
各借問始知相去近不遠何得不一相見叙情詞情詞
不得叙焉得不相思相思人間五十年未抵天上五十
炊忽然宇宙變差異六月落雪冰天遠鼃鼃山上作窟
穴蛇頭生角角有岐鰐魚掉尾斫折巨鼃脚蓬萊宮倒
水沒楣攬槍枉天爭出逞妖怪或大如甕盎或長如委
蛇光爍爍形躩躩叫鹿豕呼熊羆煽吳回翔魑魍天帝
左右無扶持蚊蟲蚤蟲蠅蚘蜚嗜膚啞血圖飽肥擾擾

不可揮筋節解折兩眼螭不辨妍與媼兩鬼大惕傷身
如受榜笞便欲相約討藥與天帝醫先去兩眼翳使識
青黃紅白黑便下天潢天一水洗滌盤古腸胃心腎肝
肺脾却取女媧所搏黃土塊改換耳目口鼻牙舌眉然
後請軒轅邀伏羲風后力牧老龍吉泰山稽命魯般詔
工倕使豐隆役黔羸礪斧鑿具鑪錘取金蓐收伐材尾
箕修理南極北極樞幹運太陰太陽機檄召皇地示部
署岳瀆神受約天皇墀生鳥必鳳皇勿生梟與鵠生獸

必麒麟勿生豺與狸生鱗必龍鯉勿生蛇與蝥生甲必
龜貝勿生螭與蜚生木必松楠生草必薺葵勿生鈎吻
含毒斷人腸勿生枳棘覃利傷人肌螟蝗害禾稼必絕
其蟻蚍虎狼妨畜牧必遏其孕孳啟迪天下蠢蠢氓
蹈禮義尊父師奉事周文公魯仲尼曾子與孔子思敬
習書易禮樂春秋詩履正直屏邪敬引頑嚚入矩矱雍
雍熙熙不凍不饑避刑遠罪趨祥祺謀之不能行不意
天帝錯怪恚謂此是我所當為眇眇末兩鬼何敢越分

生思惟呶呶向瘖盲洩漏造化微急詔飛天神王與我
捉此兩鬼拘囚之勿使在人寰做出妖怪奇飛天神王
得天帝詔立召五百夜叉帶金繩將鐵網尋蹤逐跡莫
放兩鬼走逸入嶽巖五百夜叉个个口吐火搜天刮地
走不疲吹風放火烈山谷不問杉柏栲櫟蘭艾蒿芷蘅
茅茨燔焮熨灼無餘遺搜到九萬九千九百九十九仞
幽谷底捉住兩鬼眼睛光活如琉璃養在銀絲鐵柵內
衣以文采食以麋莫教突出籠絡外踏折地軸傾天維

兩鬼亦自相顧笑但得不寒不餒長樂無憂悲自可等
待天帝息怒解猜惑依舊天上作伴同遊戲

程孟陽云公樂府多

似太白少陵間學張又昌王仲初此又在盧仝馬異間奇怪直彷彿昌黎矣

過南望時守閘不得行

客路三千里舟行二月餘壯顏隨日減衰鬢受風疎蔓
草須句國浮雲少吳墟愁心如汶水蕩漾遶青徐

殺氣

殺氣乾坤黑陰氛日月黃已成心曲亂不復鬚毛蒼夜

哭城笳裏朝烟野戍傍扶傾無郭李何地尚耕桑

望孤山作

返照千山赤寒煙一島青羈心霜下草生態水中萍黃
屋迷襄野蒼梧隔洞庭空將垂老淚灑恨到滄溟

青絲馬

蹀躞青絲馬艱難赤伏符窮陰歲欲暮落日鬼相呼見
鴈愁心裂看天淚眼枯殷勤夜深月還照旅魂孤

古戍

古戍連山火新城殷地笳九州猶虎豹四海未桑麻天
迴雲垂草江空雪覆沙野梅燒不盡時見兩三花

客路

客路秋風裏扁舟夕照時渚鴻魚復陳江樹井陘旗哀
朽嗟誰與愚蒙荷帝慈山中牧羊子歲暮爾相期

不寐

不寐月當戶起行風滿天山河青靄裏刁斗白雲邊避
世慙商綺匡時媿魯連徘徊懷往事惻愴感哀年

夏日雜興

曾樓迢遞俯清郊，天際羣山檻外交。
日暖水禽鳴哺子，風輕沙燕語尋巢。
綠荷雨洗藏龜葉，翠竹烟寒集鳳梢。
可嘆仲宣歸未得，苦吟終日倚衡茅。

二月七日夜泊許村遇雨

漫喜晴天出北門，還愁急雨送黃昏。
山風度水喧林麓，野樹翻雲動石根。
宿麥已隨江草爛，新泉休共井泥渾。
魚龍浩漫滄溟濶，澤畔誰招楚客魂。

二月二十三日自黃岡還杭塗中作

日照江邊春樹林
繇花亂葉感人心
花間蛺蝶漫多事
葉底杜鵑非好音
舉目山川成皓首
側身天地一靄襟
解愁唯有尊中酒
疾病年來已厭斟

春興

深春積雨感年芳
暮館輕寒透客裳
翠柳條柔先改色
紫蘭花冷不飄香
山中虎豹人烟少
海上樓臺蜃氣長
燕子新來畏霑濕
一雙相對立空梁

次韻和新羅嚴上人秋日見寄

愛汝精藍抱翠微，青松綠竹共依依。
龜臺落日明霞綺，鰻井寒潮長石衣。
銀杏子成邊鴈到，木犀花發野鶯飛。
鐘殘永夜禪心定，一任秋蟲促杼機。

宿賈性之市隱

今年冬雨不作雪，屋頭烏聲渾似春。
絕憐草色綠鋪地，可愛梅花白照人。
時物已迎新歲換，交情空向異鄉親。
忽思昨夜殘燈裏，錯認還家夢是真。

次韻和孟伯真感興

二首

五載江淮百戰場，乾坤舉目總堪傷。
已聞盜賊多于蟻，無奈官軍暴似狼。
綠水青山人寂寂，長烟蔓草日荒荒。
弟兄零落音書絕，腸斷春風鴈一行。

無用文章豈療飢，勞生筋骨已支離。
窮愁杜甫家何在，落魄陳平志未奇。
草澤狐狸三窟固，江湖波浪一帆危。
故園春色年年到，綠葉紅花好為誰。

感興

二月江南雪始飛吳山寒色動征衣莫尋花徑防泥滑
且掩衡門待日晞弱柳先舒應自損蟄蟲已出更安歸
乾坤處處旌旗滿肉食何人問采薇

廢雲山堂有感

堂在府治聽事後
郡守退食之所

雲山堂畔垂楊柳曾見新堂結構成一吏傳言奔里役
幾家掩淚輟農耕花明粉黛春開宴月照樓臺夜按箏
破瓦斷磚今滿地綠莎青草為誰生

次韻和林彥文在縉雲見寄

十年井邑化為墟滿眼荆榛塞路衢雞犬真成天上去
神仙不復好樓居風凋野樹無棲鳥水落池蓮有涸魚
欲訪軒轅問消息太微風雨隔清都

丙申歲十月還鄉作

三首

故園梅蕊依時發異縣歸人見却悲花自別來難獨立
人今老去復何之未能荷鍤除叢棘且可隨方著短籬
等待熏風暄暖後枝間看取實離離

手種庭前安石榴開花結子到深秋可憐枝葉從人折

尚有根株為客留
枳枸悲風吹白日
若華高影隔青丘
壞垣蟋蟀知離恨
長夜淒涼弔獨愁

小舟衝雨清溪上
雨密溪深宿霧昏
游子到家無舊物
故人留客欲空尊
荒畦蔓草纏蒿草
落日青猿叫白猿
語罷不須還秉燭
耳聞目見總銷魂

聞盜過界首季君山亦蒙訪及以詩唁之

妖星何故犯奎躔
鶴上雲霄鯉入淵
寇退喜聞曾子反
書焚尚賴伏生傳
蠶酸并與青氈去
瓜苦空餘綠蔓牽

慚媿北郊湯博士白鹽赤米數相憐

贈西巖道元和尚

西巖寺裏雲巢子不到人間幾十年
杖錫野猿迎路側談經山鬼立燈前
塵飛劫火青春夢雪滿長松白日眠
近得淵明入蓮社興來時復有詩篇

愁感代哭

燕鴻北去又南來斷壑荒岡幾劫灰
慈母磯寒風落木望夫石老雨添苔
江流定與天河合客淚還經地底回

未必春光便銷歇
白華猶發燒殘梅

感興

百年強半已無能
愁入膏肓病自增
千里江山雙白鬢
五更風雨一青燈
繡絃急管誰家宅
廢圃荒窰昔代陵
不寐坐聽雞唱盡
素光穿牖日華升

江上曲

數樹垂楊綠水邊
問郎何不繫蘭船
浦沙新漲看山遠
半夜月明無杜鵑

題沙溪驛

澗水彎彎繞郡城
老蟬嘶作車輪聲
西風吹客上馬去
夕照滿川紅葉明

送鮑生之閩中

青青芳草夾長堤
漠漠輕烟送馬蹄
他日相思建溪上
棠梨花發鷓鴣啼

絕句漫興

莫道花開便是春
莫言沙漲即成津
北風過了東風起

愁殺江頭待渡人

江行雜興

二首

馬當之山中江中其下乃是馮夷宮良宵月出江水底
行人喜值天無風

九龍山西西日沈江雲壓地生層陰汀洲無人蘆葉響
哮虎一聲風滿林

過閩關

二首

關頭霧露白濛濛關下斜陽照樹紅過了秋風渾未覺

滿山秔稻入閩中

峻嶺如弓驛路賒清溪一帶抱山斜高秋八月崇安道
時見棠梨三兩花

過蘇州二首

姑蘇臺下垂楊柳曾為張王護禁城今日淡煙芳草裏
暮蟬猶作管絃聲

陌上清歌最可聽誰知此是斷腸聲就中更有楊枝曲
恨殺昏鴉及曉鶯

有感

魚鹽充刲稻梁肥誰寤
繇華是禍機日暮無人
言亡國
寒鴉猶帶夕陽飛

明詩綜卷三

謹案卷三第二頁後四行穆爾薩舊作密里沙今

改 後五行舒穆魯舊作石抹今改後倣此

十八頁後七行布延舊作普顏今改

欽定四庫全書



總校官庶吉士臣張能照

校對官編修臣閔惇大

謄錄監生臣吳中嵐

欽定四庫全書薈要

集部
明詩綜卷四

詳校官編修
臣王天祿



欽定四庫全書薈要卷二萬四百七十七

集部

明詩綜卷四

翰林院檢討朱彝尊編

王廣洋 三十一首

廣洋字朝宗高郵人洪武初為中書左丞封忠勤伯拜右丞相尋貶廣東有詔數其罪自縊死

有鳳池吟橐

宋景濂云右丞以絕人之資博極群籍作為詩章從征伐則震蕩超

越在廊廟則莊雅尊嚴

徐子元云忠勤詩如瑤臺明月鳳笙獨奏

王元美云汪朝宗如胡

琴羌管雖非太常樂琅琅有致俞汝成云石丞
氣骨雄渾語意真朗卓然可傳顧玄言云汪
忠勤詞新調閒不失唐人大簡穆敬甫云汪
詩如春林舒葉橋鳥羣飛又云高朗有致構思
頗覺不苦

靜志居詩話忠勤詩饒清剛之氣一洗元人纖
縵之態五言如平沙誰戲馬落日自登臺湖水
當門落松雲傍枕浮懷人當永夜看月上疎桐
對客開春酒當門歸落花天垂芳草地漁唱夕
陽村倒藤懸宿鳥絕壁掛晴霓暮雲生楚樹涼
雨過邗溝碧樹藏蠻邏清歌發蠻舟江雲垂暝
遠楚樹入秋多濁酒傳杯重烏絲界紙勻岸沙
留醉卧山鳥答行歌晴光生北固暮雨隔西津
濕雲纏戍鼓高柳聚城鴉濁浪橫衝海斜陽半
在船雲木深藏廟淮流直到門沙明宜見雪月

上可行舟涼風吹雨過好鳥背人還春杯黃秫
酒野飯碧芹羹欲往尋芝草因之采茯苓可入
唐人主客圖靜居北郭
猶當遜之母論孟載也

別知己

北風吹征帆飄飄西南馳山川聿修阻霜露忽淒其今
我遠行邁豈不念歲時翩彼晨飛鴻翱翔亦何之感我
同袍友感感懷此離此離雖可懷觴酒當載持各言崇
令德金石以為期

明發

膏車待明發逶迤上河梁親朋羅祖餞冠蓋燦成章條
風被原隰春日當載陽鳴鳥餘好音雜葩紛衆芳魴魚
始登薦旨酒屢充觴既醉復瞋言欲去故傍徨維周仲
山甫王命慎所將夙夜無有懈庶幾終允臧斯言啟深
省勗哉何日忘

過宜興西泠

廣韻於
寒切

青青銅棺山下有郡西泠泠鹵居者多頗與市聲遠野
篠接深塢疎梅照清淺一丘與一壑安分良足遣我行

日驅馳適此遂遊行

登忠勤樓聽久孚賀架閣彈琴

畫棟棲朝霞層檐宿秋霧振衣坐前楹援琴寫中素幽
泉鳴澗深落花傷春暮油然聞至音令人起遐慕

繁昌夾

繁昌夾繁昌夾口江流狹波濤洶洶雲冥冥蘆葦蕭蕭
風颯颯擢郎三日無北風背牽百丈行澤中前歌未斷
後歌發野烟孤沒驚飛鴻繁昌夾流深幾許繁昌人民

夾前住苦竹截篙蘆縛舟打魚燒山自成趣人生處世
何者榮一褐足以安其生但得有溪可漁有土可耕何
用出入誇肥輕君不聞五陵公子多豪舉甲第連雲燿
飛翥朝聞鼙鼓擊春風暮見彤扉鏢秋雨

寄西掖諸友

玉簫吹鳳皇關月寫滄浪故國幾時到高樓今夜長候
蟲啼露壁涼葉下銀牀無限懷人意裁詩遠寄將

忠勤樓諸老夜直余時守省作詩寄之

西掖延秋爽高樓倚太清玉繩當坐轉銀漢近人明上
相思經濟諸公任老成不知前席夜曾語及蒼生

晚晴江上

江水鴨頭綠楚山螺髻青鷓鴣啼不盡花發樹冥冥微
風汎蘭漿落日過松亭勝境思彌愜漁歌隨處聽

登蔣山望江亭次韻

絕頂出華構有時來一登曾將六朝事閒問百年僧寓
目誠多感投身媿未能暫留林下夕江浦散漁燈

送院判俞子茂進兵番陽

江東風日晴把酒送君行好慰三千士將收七十城煙
花催疊鼓雲騎擁連營山國人爭喜殊方自此清

寄崔元初

晴軒種竹罷好月到窓時坐我長松下歌君流水詩墓
田歸野雀疎雨落山葵偶值南來使殷勤寄所思

嶺南道中

過盡梅關路灘行喜順流滯江元到海橫石不容輶嶺

樹垂紅果汀沙聚白鷗從來交廣地還是古揚州

灘行

灘上水平沙拔舟蕩落花吳儂不相識對面浣春紗

蘇溪亭

蘇溪亭上草漫漫誰倚東風十二闌燕子不歸春事晚
一汀煙雨杏花寒

山行

米家圖畫不易得今日見山如見之偶上層巒縱游目

不知駐馬已多時

江上 三首

大山小山松樹齊
千聲萬聲子規啼
攬衣起舞夕露下
三更月落吳城西

褚磯口濶浪如山
官船客船前後灣
明日天晴大家喜
看我鼓枻中流還

象牙灘上百花開
參差時復見樓臺
翠香芹菜綠沙出
雪色鮒魚上水來

夜泊揚子橋

揚子橋頭夜泊船
水波纔定月初圓
不眠細數經行日
笑隔東風又一年

嶺南雜詠

五首

牂牁流水碧潺潺
潮落潮生草木間
一片海雲吹不起
越人遙指是崖山

鴈翔城東湧怒濤
外洋水長蜚船高
莫言昨夜南風急
今日登盤有海螵

越鹽如雪賽吳鹽諸蒨初肥竹筍甜何事眉山蘇太守
只將雙蟹較團尖

村團社日喜晴和銅鼓齊敲唱海歌都道二年生計足
五畝蠶繭兩收禾

蠻落人家厭食魚兒孫生長不知書枕椰滿種緣山邏
翡翠新收越海墟

涼州曲

琵琶初調古涼州萬壑風泉指下流好是貞元無事日

玉宸宮裏按新秋

竹枝詞

三百六十灘水清桃花春漲近來生催歸不待臨岐語
昨夜子規啼到明

東吳擢歌二首

太湖茫茫水拍天吳儂只慣夜行船竹枝敲罷燈將滅
風雨蕭蕭人未眠

艇子搶風過太湖水雲行盡是東吳阿誰坐理青絲網

遮得松江巨口鱸

蘭溪櫂歌 二首

涼月如眉挂柳灣
越中山色鏡中看
蘭溪三日桃花雨
夜半鯉魚來上灘

櫂郎歌到竹枝詞
一寸心腸一寸絲
莫倚官船聽此曲
白沙洲畔月生時

晚過清河驛

溯流西望渺如煙
黃帽齊將百尺牽
日暮雨來風浪惡

隔河槌鼓換官船

陶

安

二首

安字主敬太平府人元末為明道書院山長王
師渡江首率父老奉迎留置幕府歷左司郎中
出知黃州降桐城令移知饒州仍改知黃州召
為翰林院學士尋擢江西行中書省參知政事
卒于官贈姑孰郡公追謚文憲有知新槩江行

雜詠

俞右吉云郡公謀略文章孝陵推為
第一詩亦拔俗五古未免冗長耳

寄豐叔良

阿咸九月到寄我尺書看盡日不釋手空江頻倚闌鄉
山微雨外客夢一窓寒遙想林泉勝無憂寢食安

湖鄉

肥水新無警湖鄉頗有年稻田驅夜豕蓮蕩捕秋鱖
羅卒黃茅戍歸人白板船數家依綠樹斜日照炊煙

孫炎 三首

炎字伯融句容人國初辟行省掾尋以省都事

總制處州會苗將叛被擒罵賊死追封丹陽縣

男謚忠愍有左司集

徐子元云左司詞氣豪邁類其為人渥洼神駒一蹴

千里 王元美云孫伯融如新就銜馬步驟未熟時見輕快

詩話伯融至正中與天台丁復同郡夏煜皆以詩名下筆百紙立盡謫處似李長吉質處似元次山在處時明祖命招致伯溫伯溫堅不肯出以寶劍遺伯融伯融作詩以為劍當獻天子封還之伯溫無以答乃逡巡就見而李時遠詩統謂此劍左司家藏作歌以贈劉者誤也

寶劍歌

寶劍光耿耿佩之可以當一龍直是陰山太古雪為誰

結此青芙蓉明珠為寶錦為帶三尺枯蛟出冰海自從
虎革裏干戈飛入芒碭育光彩青田劉郎漢諸孫傳家
惟有此物存匣中千年睡不醒白帝血染桃花痕山童
神全眼如日時見蜿蜒走虛室我逢龍精不敢彈正氣
直貫青天寒還君持之獻明主若歲大旱為霖雨

題好溪圖送憲使黃繼先

君乘馬望君來括蒼下君乘舟望君來好溪頭好溪水
生玳瑁魚好溪水生明月珠好溪水生青珊瑚使君來

此月再樞惟飲此水無一需使君之清水不如臨別贈
君青絲轡隨君馬頭行萬里相思之心有如水

贈黃鍊師

留侯弟子有初平九歲從師往玉京天與數書皆鳥迹
家傳一劍是龍精瑤池桃核無消息海水桑田又淺清
我為紫芝歌一曲夜深相答洞簫聲

全思誠一首

思誠字希賢上海人洪武十五年以耆儒召為

文華殿大學士兼左中允致仕有砂岡集

寄題玉山草堂

草堂中人天下奇昔聞盧鴻今見之鯨牙已出滄海底
鳳雛猶隱崑山陞村醪醉客飛鑿落竹牀卧月吹參差
相知何必曾相識畫裏題詩寄所思

鮑恂
三首

恂字仲孚崇德人元末薦授翰林不就洪武四年
會試充考試官十五年詔徵耆儒入見命為

文華殿大學士固辭放歸有西溪漫槩

周青士云西溪

詩傳者絕少屢聞海鹽胡氏有刊本求之不得嘗見其題畫詩云山橫紅葉晚寺鎖碧雲涼亦佳句也

詩話湖州嘉興二志竝云仲孚與安吉余詮上海全思誠高郵張長年四人就徵考實錄入見祇三人其同徵一人未至乃登州張紳非思誠也又洪武四年會試仲孚以前貢士與翰林院侍讀學士詹同同文國子監司業宋濂景濂吏部員外郎原本景道同充考試官是年主文官則禮部尚書陶凱中立前翰林院侍講學士潘庭堅升聞也王元美別集所述未合

寓感

迢迢漢川上有女麗且閒佩以雙明珠游戲清波間翩
然若飛鴻可望不可攀贈我翡翠羽報之以秋蘭徘徊
碧雲暮引領空長歎

題吳仲圭平遠圖

蒼山遙遙幾千里綠樹參差碧煙起雙帆忽從江上歸
影落斜陽濕秋水林陰蒼莽鳥不飛石徑蹒跚行人稀
松根似可縛茅屋沙尾亦足容漁磯我嘗西遊倚江閣
極目長空入寥廓好山不肯過江來恨不乘風跨黃鶴

吳君畫手當代無落筆何年成此圖安能著我巖壑底
相覓老樵尋釣徒

盛叔章畫

煙濕空林翠靄飄渚花汀草共蕭蕭仙家應在雲深處
祇許人間到石橋

朱善一首

善字備萬豐城人洪武初官至文淵閣大學士
卒謚文恪有一齋集

遠別辭送餘干令李謙山

風淅淅兮雲悠悠木葉落兮天宇秋君胡為兮不返嗟
久客兮淹留攬西山兮秀色泛東湖兮弄明月樂莫樂
兮新知心奚忍兮輕別山有虎兮湫有龍勞余思兮忡
忡眇餘干兮何許揮五絃兮送孤鴻父老兮扶藜兒童
兮竹馬侯之去兮我心悲侯之來兮我憂寫桂櫂兮蘭
舟搵子祛兮夷猶南州雖好兮不可以久處嗟子去兮
何以慰我之離愁

宋 訥八首

訥字仲敏滑縣人元季官鹽山知縣國初徵為

國子助教陞翰林院學士文淵閣大學士遷祭

酒卒于官正德中追謚文恪有西隱稿

李時遠云宋公

師道尊嚴為一代典型詩文渾健古雅同游諸儒皆推之

詩話高季迪之文蘇平仲之表箋泐公之詩當時文字之禍烈矣然其間遺民諸集類不避諱當王師之入燕也若王原吉丁鶴年戴叔能陳敬初輩其詩詞指斥未易更僕數宋公身歷通顯其過元宮諸詩悲涼酸楚雖初明通天之表于山江南之賦無以踰之他若華表柱頭相語

鶴林陵江上獨歸鵝半船涼色潮生海兩岸秋
風浪拍沙縛蘆密覆低低屋把竹輕撐小小船
野航招客買蓮子沙鳥驚人入荻花夕陽野飯
烹魚釜秋水蒲帆青蟹船斷壁野花迎客權壞
牆津柳曬魚
曾句亦自佳

壬子秋過故宮
八首

離宮別館樹森森秋色荒寒上苑深北塞君臣方駐足
中華將帥已離心興隆有管鸞笙歌劈正無官玉斧沈
落日凭高望燕薊黃金臺上棘如林

萬國朝宗拜紫宸于今誰望屬車塵名聞少室徵奇士

驛斷高麗進美人朝會寶燈沈轉漏授時玉歷罷頒春
街頭野服儒冠老曾是花塲視草臣

黃葉西風海子橋橋頭行客吊前朝鳳皇城改佳游歇
龍虎臺荒王氣消十六天魔金屋貯八千霜塞玉鞭搖
不知亡國盧溝水依舊東風接海潮

鬱蔥佳氣散無蹤宮外行人認九重一曲歌殘羽衣舞
五更妝罷景陽鐘雲間有闕推雙鳳天外無車駕六龍
欲訪當時泛舟處滿池風雨脫芙蓉

五雲雙闕俯人間
歲晏天王狩未還
鸚鵡認人宮漏斷
水沈銷篆御牀閒
朝儀無復風雲會
郊祀空遺日月顏
莫向邊陲動戎馬
漢兵已過鐵門關

萬年海岳作金湯
一望淒然感恨長
禾黍秋風周洛邑
山河殘照漢咸陽
上林春去宮花落
金水霜來御柳黃
虎衛龍墀人不見
戍兵騎馬出蕭牆

清寧宮殿閉殘花
塵世回頭換物華
寶鼎百年歸漢室
錦帆千古似隋家
後宮鸞鏡投江渚
北狩龍旗沒塞沙

想見扶蘇城上月照人清淚落悲笳

雲霄宮闕錦山川不在穹廬毳幕前
螢燭夜游隋苑圃羊車春醉晉嬋娟
翠華去國三千里玉璽傳家四十年
今日消沈何處問居庸關外草連天

詹同十二首

同字同文初名書婺源人元末為郴州路學正
遇亂家黃州仕陳友諒為翰林學士承旨歸附
後賜今名授國子一云中書博士累官吏部尚書改

翰林學士承旨謚文憲有天衢舒嘯

宋景濂云同文襟期

瀟灑濟以雄博之學故體物瀏亮鏗鏘作金石聲

徐子元云同文赤色精金與鍤自別

詩話同文與吳濬仲樂致和宋景濂齊名號中朝四學士吳樂韻語寥寥亦非其本色於四子中遂為翹楚

清江曲

清江水清峽水黃清江之上多綠楊浣花女兒立沙際
青裙白足如秋霜蜀山霜消十日雨一夜扁舟欲齊樹
兩岸猿聲不肯休送君流過峽川去

北邙行

累累北邙墳鑿石為虎羊憶昔葬此初爵封侯與王導
以方相氏飄飄銘旌揚紫車雜縞騎鐃鼓喧周行執紼
人如蟻哭聲動穹蒼相送至窀穸日暮下黃腸生既享
華榮死亦增輝光焉知千載後無人奠殽漿寶氣夜忽
露大盜發所藏不見馬鬣封但見白骨荒空留一斷碑
龜趺卧夕陽遂令往來者過此生感傷感傷亦何為生
死人之常陰陽有晝夜誰云無興亡萬物終消盡天地

復渾茫何史垂功名何世成文章金石且不堅豈獨人
久長

秋夜吟

桂樹叢叢月如霧山中故人讀書處白露濕衣不可去
題方壺水石圖

古壁之間屋漏痕淋漓元氣凝清渾道人山中守龍虎
十日不見煙塵昏拂拭填作一枯木下有碎石分崑崙
斷劒插入怪厓底老蛟迸出秋雲根神君怒立被玄髮

欲騎鐵驥超天門當時揮灑妙莫測鬼物驚走如星奔
青城仙伯絕筆久覩此髣髴其人存玄同隱者卧松雪
得畫遠寄來江村却憶麻姑洞口樹使人一夜勞心魂

題善原道韓幹黑馬圖

善家堂上書滿厨古今名畫頻卷舒我來一見韓幹筆
龍精自與凡馬殊玄鬣披披首渴烏紫瞳皦皦雙明珠
黑雲一片忽墜地房星半夜飛神都御溝流水柳千樹
圉人騎出拂春露黃金腰帶素花衣馬上回頭看飛絮

絲韁在手不敢縱追風恐過龍樓去君不見向來畫馬
只畫肉神逸之氣多不足幹遺真蹟世所稀使我見此
思天育善家兄弟一馬驄此馬真與麒麟同白璧玉斗
亦不換早晚持獻明光宮

送德安張用周遊廬山

匡廬山高雲氣多老木如石盤紫蘿松橋流水度金澗
我昔結屋山之阿桑落洲邊種柑橘蓮花峰下尋芝朮
仙宮臺榭作比鄰每欲相從候丹術寄詩畫喚白猿來

巡杏夜驅元虎出飛仙別去今幾年海上不見回樓船
思之夢繞瀑布水玉琴為奏冰絲絃張君多古學才器
何卓犖紛紛文狸赤豹間五色麒麟生一角朝辭白兆
山暮過黃鶴樓去觀五老峰翠色連天浮醉揮綠玉杯
笑贈珊瑚鈎商婦亭前歌窈窕灌嬰井上嘶驂騑讀書
白鹿之洞裏寫字洗墨之池頭匡廬清泉消百憂我所
樂處君當遊霓旌羽駕在丘壑相逢往往皆仙流與君
大藥駐光景人間回首三千秋

高暹獻天馬圖歌

蜀人高暹能畫馬令人往往愁龍化凡夫肉眼匪方歎
世間誰是識龍者前年曉御慈仁殿佛郎之國天馬獻
蘭筋虎脊渥洼姿長風西來起雷電侍臣傳敕貌真龍
周郎為圖圖最工玉堂學士揭曼碩早朝奏賦蓬萊宮
當時觀者集如堵敕賜金盤五色露天馬出馳海子東
但見中天黑煙霧君不聞太宗奔虹赤玄宗照夜白唐
初曾數江都王今之名畫亦難得吾聞高暹善草書墨

池向復飛龍駒黃鶴樓中獻馬圖藩王一見極所娛天
機剪取雲錦段玉盃分賜葡萄珠好去京師謁周郎應
見揮毫九天上翠華所駕皆龍媒何事江南繪屏障

出獵圖

朔風凜凜吹龍沙年年馬上長為家陰山大漠百草死
獵遍青海濱天涯旌旗裂盡霜華濕萬騎貔貅似雲集
蒼鷹歔起若飛電四尺神獒作人立什圍五攻兵法存
發蹤指示知何人豈無詭遇獲禽者誰能為爾鸞梟分

直將勇氣飽所欲寢虎之皮食虎肉生擒山下九青兕
射殺巖前雙白鹿日暮歸來雪洗箭血灑腥風滿河曲
穹廬散野如繇星涼月蕭蕭照平陸酪漿跪進瑪瑙盃
黃面奚奴眼睛綠明朝滿馬馱爛斑藩王喜生紅玉顏
焉知祝網三驅意但醉氍毹紫塞間君不見暴殄天物
焚咸丘畫師之筆學春秋還君此圖長太息使我忽憶
比蒲菟

題松鶴蔡先生家藏李伯時西嶽降靈圖

前二人
騎行後

三人徒步狀若馳獵者其最後則有雲氣神人居
中嗟夫禹鼎象姦齊諧志怪世或有之但恨無胥
臣之多聞子產之博物匪覽載籍未遑
夷考模寫畫像為作短篇以俟知者

龍眠居士畫入神展畫冥搜畫中意白日杲杲人出眈
長風蕭蕭雲拂地前有一匹雪色駮次有一匹玄花驄
兩人冠服何其雄若非將相應王公繇纓寶鞍金匱匣
各持羽箭懸雕弓後有三人總徒步蒼鷹黃犬行相從
雲中歛見光燦爛玉輶瑤輿下霄漢不駕紫鳳白麒麟
海犀天駟多奇玩鸞旌虎節旋低昂星仗霞幢互繚亂

無乃朝辭太華峰得非曉過雲臺觀輦中坐者真人
晁珠龍袞儼昭煥金童玉女續往來慶雲為馭天為階
長眉刷翠面如月知有道骨無塵埃令人可望不可及
恍惚雲中相出入衣沾玉井碧蓮香旗翻仙掌露華濕
我識泰山封禪書不識此畫當何如人言西嶽降靈圖
西嶽或有人間無

送黎蘭谷遊永川

舟子開帆日天風吹雪時關河歲將晏荆楚客何之水

接三苗國雲迷二女祠經過逢北鴈應有寄來詩

題雲林丹房為葛元德賦

盤龍菴前翠可食道人鑿雲開竹房丹光出林如月白
石髓滿山連水香每聞向此采芝朮欲往從君愁虎狼
展圖使我空歎息三十六峰清夢長

題山陰草堂

草堂正在匡廬山山陰綠玉相對閒雲從雙劍峰前下
潮到小孤江上還茶煙滿室寫墨竹花雨一簾觀白鵬

誰似南宮能篆古為君高置軒窓間

宋 濂 五首

濂字景濂浦江人元末用薦除翰林編修以親
老辭入仙華山為道士國初徵至授皇太子經
居禮賢館修元史充總裁官仕至翰林學士承
旨兼太子贊善大夫正德中追謚文憲有潛溪

翰苑芝園蘿山諸集

俞汝成云學士詩文俱著
而文勝於詩然開國文獻

之傳集固不可闕者 王元美云宋景濂王子
克雖以文名而詩亦嚴整妥切 顧玄言云公

文既博綜詩稍平易李舒章云公開國文士
之冠猶襲元調朱朗詣云太史之文舍人遂
之書評者以本朝第一目之韻
語則非所長集雖多不作可也

詩話王子充叙景濂集云古今文章作者未易
悉數即娶而論南渡後有東萊呂氏說齊唐氏
龍川陳氏各自成家而香溪范氏所性時氏先
後又間出近則浦陽柳公烏傷黃公竝時而作
踵二公而起者為吳正傳氏張子長氏吳立夫
氏當呂氏唐氏陳氏之竝起也新安朱子弟子
曰勉齋黃氏寔以其學傳之北山何氏而魯齋
王氏仁山金氏白雲許氏以次相傳胡仲申叙
王子充集云吾娶以學術稱者至元中則金公
吉甫胡公汲仲為之倡汲仲之後則許公益之
抑公道傳黃公晉卿吳公正傳胡公古愚卓立
並起而張公子長陳公君采王公叔善又皆彬

彬附和於下言文獻之緒者以娶為首稱合而公之言繹之金華文章理學之源備於是矣景濂於詩亦用全力為之蓋心慕韓蘇而具體者

哀海東

有序

客有吏於海東者以能擊貪暴聞然終用是受誣嘔血死予友胡徵君為著哀辭一通予讀之甚悲竊取其意作哀海東傷妖女二操使善琴者彈而和之

我哀東海而思之苦彼何人斯猛噬如虎我不擊之我

民之憂縱不我與覆以我為仇蒼天雖高冤其有極非
血之嘔曷明心赤泱泱大風沈沈寒泉舍旃舍旃我尚
何言

傷姝女

有姝者女顏如舜英詆我以醜我其何傷眩白為黑古
亦多有自尤不遑敢誰之咎黃鵠飛來其音閭閻我心
苟安何戚弗欣天上地下命也奈何我焉知其他

灘哥石硯歌

有序

朱舍人芾雅士也近見灘哥石硯禁中遂摹搨
一本裝池成軸懸之書齋命予作歌填其空處
歌曰

朱君嗜古米黻同三代彝器藏心胃灘哥古硯近獲見
驚喜奚期逢黃琮研煤敷紙巧摹搨訪我一陳始終
有唐四葉崇象教梵僧航海來番禺手持貝葉寫健相
翻譯華竺談玄空辭義幽深衆莫識當時授筆唯房融
硯中淋漓墨花濕助演真乘誠有功愛其厚重為題識

七月七日元神龍鬼工雷斧琢削古天光電影生新容
袞將四尺廣踰半作鎮弗遷猶華嵩涉唐入宋歲五百
但見寶氣浮晴虹南渡羣公競賞識氏名環列縈秋蟲
朔元雖以實內府棄寘但使煙埃封方今聖人重文獻
羣蒙舟載來江東風磨雨濯露精彩奉勅昇入文華宮
宮中日昃萬幾暇侍臣左右咸雲從紫端玄歛盡斥去
欣然為此回重瞳重瞳一顧光照日天章奎畫分纖穠
有才沈靈恨已久石如能語誇奇逢維昔成周全盛日

兄戈盾衣并大弓藏諸天府遺孫子用以鎮國昭無窮
願將斯硯傳萬世什襲不下古鼎鐘上明文德化八極
下書寬詔蘇疲瘵君方執筆掌綸誥願以此言聞帝聰
老臣作歌在何日洪武戊午當嚴冬

題長白山居圖

滿地雲林稱隱居燕泥污我讀殘書五更風急鳥聲散
時有隔花人賣魚

宜興強如心避地而歸扁其居曰復初齋來徵予

詩

昔日機槍照五兵，今歸喜得見時平。
春風綠酒扶殘醉，斜立官橋聽早鶯。

王 禕 十一首

禕字子充，義烏人。國初徵為中書省掾，詔修元史，與宋濂同為總裁。官書成，拜翰林待制，奉使招吐蕃至蘭州，召還，改使雲南，抗節死。建文元年，贈翰林學士，謚文節。正統中，改謚忠文，有華

川玉堂二集

徐子元云子充詩亦純雅
成云忠文詩平易切實然在當時

與宋潛溪首倡
浙東功不可泯

詩話子充文脫去元人冗沓之病體
製明潔當在景濂之右惟詩亦然

南康郡齋書事

郡解新落成
繇木蔭階庇
稍欣吏牘稀
麤覺民事理
檐雀不相猜
羣飲硯池水

長安雜詩

四首

崔嵬終南山
形勢甚磅礴
西來挾崆峒
東亘聯華嶽
長

雲覆重巒紫翠入寥廓杞梓產深林龍蛇蟄幽壑淑靈之所鍾宜有異人作如何千載間蹤跡轉蕭索姪旦不復生三代已云邈後來王佐才勞我思景略

羣經載聖道昭昭如日星秦火一何烈燒燔滅其形漢儒事掇拾區區補殘零雖然有遺闕其功亦已宏唐世尚文學君臣益留情琬琰刻文字後先十三經謂茲金石堅不與竹帛并自從鴻都後此刻最為精羅列黌舍內奎壁映晶瑩我言金與石有時亦銷崩有形必有弊

斯理詎難徵安知聖人道所託非所憑天地共終始猗歟罔能名

步出城東門穹然見丹牆不知何王宮金碧猶煒煌云是元帝子分茅鎮此疆傳世僅三葉嗣胤今滅亡深宮閔珍果迴溝亂垂楊撫物足流盼感時忽凝傷自古有興廢天道非茫茫

人生百年中窮通無定跡譬如風前花榮謝亦頃刻當時牧羊豎尊貴今誰敵顛顛種瓜翁乃是封侯客丈夫

苟得時糞土成拱壁一朝恩寵衰黃金失顏色古昔諒
皆然今我何歎息

送許時用歸越

舊擢庚寅第新題甲子篇老來諸事廢歸去此身全煙
樹藏溪館霜禾被石田鑑湖求一曲吾計尚茫然

秦州

水積從天降山連與蜀通遺碑李廣宅廢寺隗囂宮度
隴遲迴際游秦感慨中長憐少陵老曾此歎塗窮

澠池道中

九月忽又暮吾行祇自傷秋兼人共老愁與路俱長野
果迎霜赤園花帶雪黃故人相慰藉日晚引壺觴

春日繡湖與德元同行

十里華川上年來足勝游雨花林下寺風柳驛邊樓漠
漠芙蓉浦依依杜若洲平生身外事未許付浮鷗

吳江客中冬至日

十年奔走竟何依轉覺謀生事事非時序每驚愁裏換

家山長向夢中歸
吳江歲晚寒波積
楚塞天空鴻鴈稀
酒後登樓倍惆悵
緇塵猶滿舊征衣

桐廬舟中

瀟灑溪山夢此邦
輕風細雨過桐江
川迴幾訝船無路
林缺時看屋有窓
野果青包垂个个
水禽白羽去雙雙
到家會值重陽節
新釀村醅正滿缸

張以寧 十五首

以寧字志道古田人
元末官翰林學士承旨明

初例徙南京召為侍讀學士三使安南道卒有

翠屏前後集

陳廷器云學士詩沈鬱雄健者可追漢魏清婉俊逸者足配盛唐

徐子元云志道高雅俊逸超絕畦畛翠屏千仞可望不可躋王元美云學士韻語亦健氣格

少完穆敬甫云翠屏

健翮凌風急疾無前

詩話承旨重峰送別一篇仿太白可稱合作李方伯楨題雙燕圖寄人詩云君家吟谿北我家郡北西君家梁間燕我家梁間栖周尚書忱送人詩云我家白沙渚君家桐江頭我家門前水亦向桐江流當皆從此出可知是作膾炙當時

送重峰阮子敬南還

君家重峰下我家大溪頭君家前門水我家門前流我
行久別家思憶故鄉水況乃一作何況故鄉人相見六千里
十年在揚州五年在京城不見故鄉人見君難為情見
君情尚爾別君奈何許送君遽不堪憶君良獨苦君歸
過江上為問水中魚別時魚尾赤別後今何如

林志尹秋江漁父圖

江風搖柳雲冥冥小舸釣歸潮滿汀賣魚得錢共秋酌
白酒船頭青瓦餅樵青勸酒漁童舞擊甌唱歌無曲譜

船前野鴨莫驚飛我有竹弓不射汝

予別黃巖十又六年謗焉德薄父老當不復記然
區區常往來於懷也如海上人來見語疊疊不能
休別又依依不忍釋予不知何也賦此以贈

朗公相見廣陵春自云家世黃山人老夫疇昔黃山客
江海見之情轉親坡陀石上曾波雪遍海蓮峰白於月
新詩句句鬪清妍高誦長風動疎樾清晨言別索題詩
我哀詩減黃山時春潮日夕海門去歸報山中耆舊知

題海陵石仲銘所藏淵明歸隱圖

昔無劉豫州隆中老諸葛所以陶彭澤歸興不可遏
凌歌讌功臣旌旗蔽轡轡一壺從杖藜獨視天壤濶
風吹黃金花南山在我闥蕭條蓬門秋穉子候明發
豈知英雄人有志不得豁高詠荆軻篇竦然動毛髮

題句容同林景和縣尹子尚規登僧伽塔賦

嵯峨崇明塔拔地一千丈我攀青雲梯倏到飛鳥上
微風韻金鐸初日麗銀榜維時十月交葉脫天宇曠
羣山

東南奔平川疊波浪雲間三茅峰園立儼相向碧瓦浮
鱗鱗茲邑亦云壯鷄鳴四關開攘攘異得喪塔中宴坐
仙憐汝在塵埃古時登臨人今者亦何往俯觀世蜉蝣
仰歎彼龍象乃知崑崙巔可以小穹壤同游皆雋英超
遙寄心賞霜飈天際來毛髮颯森爽太白去千年吾何
獨惆悵

嚴州大浪灘

東來亂石如山高長江斗瀉湍聲豪蛟鼉奔走亡其曹

青天白雲揚洪濤舟子撐殺白木篙長牽百丈嗟爾勞
側身赤足如猿猴舟中行子心忉忉山木龍從杜鵑號
夜飲醉歸贈王伯純是日王德容程子初同飲

歲云莫矣客不樂青雨亭前翫孤鶴城頭惜惜雲下垂
竹外騷騷風微作亭中王郎風格奇愛竹愛雪仍愛詩
開尊酒好客更好坐中王程俱白眉紅爐照閣生春霧
詩思騰騰天外去玉姬舞倦迴風來吹倒三山見瓊樹
馬蹄蹴響客歸時留我更盡金屈卮塵空祇覺乾坤白

飲醉那知賓主誰坐聞一聲兩聲折攜燈起看竹上雪
瑤華翠色森陸離人影燈光兩清絕却歸覓紙醉自題
烏啼古寺風淒淒明年此夜知何處興發還應訪剡溪

題馬致遠清溪曉渡圖

致遠廣西憲掾
子琬從子學

今晨高卧不出戶歲晏黃塵九達霧美人遠別索題詩
眼明見此清溪之曉渡溪旁秀林昨夜雨落花一寸無
行路歌攔桃葉人斷腸艇子招招過溪去紅日青霞半
晦明白雲碧嶂相吞吐詩成君別我亦歸此景宛是經

行處我呼九曲峰前船
君帆正渡瀟湘渚
鴈去冥冥紅
葉天猿啼歷歷青楓樹
是時美人不相見
我思美人美
無度美人之材濟時具
我老但有滄洲趣
他日開圖思
我時溪上春深采芳杜

送同年江學庭弟學文歸建昌

白髮江夫子青雲信獨稀
故人長北望令弟又南歸
庭樹烏先喜江帆鴈共飛
東湖春柳色到日上君衣

泊河頭水長

客路春將晚，征帆日又曛。
深山昨夜雨，流水滿溪雲。
渡黑漁舟集，村空戍鼓聞。
故園頻夢去，植杖已堪耘。

寄廣西參政劉允中

重臣授鉞殿南邦，五月旌旗過上江。
青帶碧簪環畫省，綠沈金鎖護油幢。
峒丁萬笠春耕野，海估千帆曉渡瀧。
銅柱南邊相憶處，尺書難寄鯉魚雙。

杭州歌

西陵渡口潮水平，十五五放舟行樓中。
燕子慣見客。

不怕渡頭津鼓聲

泊沽頭

楚客歸心河水流三更月暈長年愁
沙河雨漲催開閘
半夜櫓聲無數舟

有感

馬首桓州又懿州朔風秋冷黑貂裘
可憐吹得頭如雪
更上安南萬里舟

遇故人胡居敬臨江府送至新淦

翠竹蒼松映白沙清江西畔是君家明年歸路重相問
分食東陵五色瓜

劉三吾

四首

三吾初名如孫字坦甫茶陵人元末提舉靖江
學洪武中用薦除左贊善陞學士三十年主會
試以多中南人坐罪戍邊永樂中卒有璫署春
坊北園知非化鶴正氣等集桐江俞蓋知茶陵
合為坦坦齋集

詩話學士元之故老其詩雖不中程足補庚申
外史當張士誠在吳海運阻遏元主以御酒龍
衣請之不得及蘇州既平學士賦詩云姑蘇自
王亦豪雄藩屏東南一旦空稂莠祇今誰阻遏
海門元與直沽通又云吳中既失無門戶海道
長驅有舳艫蓋猶覩元之未亡其云廉蔭同心
如結好蜀吳異地豈俱亡則有感羣雄之失策
至云萬年圖籍來江表一曲琵琶度塞門斯與
宋文恪過元故宮
詩並其悽切矣

餞周左丞

從戎江漢亦多年又領王師過極邊已展召公新土宇
載開馬援舊山川諸生俎豆陳兵後父老壺漿拜馬前

最是老儒淹滯久，乞將骸骨早歸田。

次蔡元禮過洞庭

翠湖渺渺共天寬，過客登臨足解顏。
兵後已非前殿閣，望中仍是舊江山。
涼雲隱映波光裏，壞棟欹斜樹杪間。
欲向黃陵懷帝子，鷓鴣啼處雨斑斑。

寄家

離別家山已數年，故園桃李想依然。
東風客外歸心切，落日雲邊望眼穿。
龍虎衛前花夾道，鳳皇臺畔水連天。

丁寧為護溪邊石，留取歸來繫釣船。

墨竹

奎章閣老天邊字，薊北山人霜後枝。
想見披圖明寫處，循籬看罷落花時。

魏觀七首

觀初名已孫，字杞山，蒲圻人。洪武初就徵，授平江州學正，遷國子助教，歷兩浙都轉運使，入為起居注，進太常卿、翰林侍讀學士，遷國子祭酒。

尋兩知蘇州府事坐法死有蒲山牧唱

詩話明初循吏政教兼行稱蘇守魏公其修府學則宋景濂記之舉鄉飲酒禮則王常宗述之乞言養老賓饌有儀三代以後不多見也其五言古詩念切民瘼纏綿悱惻不減元道州近體亦清脫可誦當日高皇游觀上苑召與危素宋濂詹同吳琳同宴奉天門東紫閣謂曰前日送卿還今日與卿飲何其樂也命各賦詩紀之亦稱殊渥矣乃緣誣善之人一言坐以慘法甚矣君恩之不可恃也

大同江口舍舟而塗抵樊昌四十里紀實

扁舟畏風濤上馬遵大路馬喜大路平騫然欲馳驚手

疲兩足痛縱逸恐顛仆呼奴執其轡控馭使徐步前村
望煙火稍遠得農扈蔬筍兼可求午膳當不誤少頃聞
病翁喚出蓬頭婦婦出拜且言窮苦日難度夫遠克民
兵兒小當遞鋪翁病經半年寒餒缺調護軍需未離門
活計不成作荒山要收絲荒畝要輸賦誅求里長急責
罰官府怒近來點弓兵拘貧放權富迫并多逃亡蒼黃
互號慙左右三五家春深失耕務紛紜下牌帖勾捉猶
未杜所言盡真悉俾我心駭怖茲行事咨詢拯恤懼遲

暮州縣嗟匪才瑣屑誠可惡喪亂民瘼深君王重憂顧
所以諭旨勤赤子相託付民為邦之本綏撫在完固胡
為重剝剥上德阻宣布明當抗封章為爾除巨蠹

建德縣三十韻

乘舟至建德頗愛山水清山水雖可愛人煙苦凋零種
麥當縣前迂徑入縣庭瓦礫存故基小小才有廳父老
匍匐來形影何伶仃再拜泣且言樊邑頻遭兵大則吳
楚交陳畢張小則侯許征阻兵者二人逆彼族必夷順此身必

刑逃者凍餒連竄者疾疫并所剩無幾家家戶無全丁
爰從甲辰秋始見官府明令簿來撫綏曲盡父母誠流
離漸懷歸沈疴漸蘇醒田萊固多荒未免賦役徵里長
紛竝緣科需取餘贏語意殊可憐推言慰其情去歲郡
守朝綸音細丁寧民為邦之本本固邦則寧今而重傷
殘救恤誠在卿譬猶澗中魚魚樂澗欲盈又如水載舟
水激舟必傾此道垂昭昭卿等當力行軍乏捐冗條力
役止繕營治則待以寬罰則裁以輕耕稼勗有時教養

資有成苟或負所期憲度亟爾懲懇懇數百言官庶曾
共聽矧是半月餘提音下三城疆土益廣遠禮樂逾作
興於叟宜勉旃行將慶昇平

次韻陳廉使見寄

三月霏霏雨曾無兩日晴旅懷常寂寞佳節負清明野
樹暮雲合山溪春水平彭郎有音信處處避回兵

寧國溪上

輶轄山環水沿洄水繞山鳥啼山翠裏人語水聲間
蒨

屋連溪塢松舟繫淺灣村翁驅犢去溪女得魚還

遂安舟中

溪徑斜斜入柴門側側開一牛臨水立雙鴨避舟迴病
眼青山豁歸心白髮催何因莼浦上野老共傳杯

都昌懷舊隱

江霧仍為雨山花故作容秋風餘鼠雀寒水落魚龍慷
慨心雖壯羈棲力已慵白雲莼浦上悵望最高峰

夜宿江夏水驛將往衡湘留贈親友

茆屋江聲合松舟月色遲把杯頻改席翦燭共題詩攬
瑟清湘夜聞簫赤壁時美人千里外迢遞寄相思

吳伯宗 一首

伯宗名佑以字行金溪人洪武辛亥初開科帝
親擢第一授禮部員外郎歷武英殿大學士尋
降檢討有南宮使交成均玉堂四集

詩話閣老首科狀頭自後西江人物繼起於是
有狀元多吉水朝士半江西之諺予嘗購得是
科會試錄就試者一百八十九人中式一百二
十人浙江三十一江西二十七福建二十二山

西一十三北平六河南廣東各五陝西四山東
三廣西高麗各一直隸止二人考宋景濂會試
錄稱先是京畿遵行鄉試中程式者七十二未
及貢南宮上求治之切皆採用之蓋庚戌京畿
所取士先會試
而授之官矣

題李氏棲碧樓

唐有謫仙人風骨特高妙晚愛棲碧山間心付登眺桃
花與流水目擊領其要遐觀窮有象幽討入無竅不知
誰相問但覺遺一笑聲落天地間松風紫鸞叫諸孫企
高躅異世頗同調瑤樓睇空青銀榜生光耀予亦愛其

人臨風劃長嘯

危素

四首

素字太樸金谿人仕元至翰林學士承旨洪武
初授翰林侍講學士兼弘文館學士謫佃和州
有雲林詩集

梁國狄文惠公新廟詩

大江從西來萬里流湯湯維唐社稷臣勲業載旂常天
子在房陵女后御明堂晨聞牝鷄鳴腥聞溢穹蒼猗公

秉忠義耿耿立廟廊周旋極黽勉論議忽慨慷載御卷
冕歸宗社赫有光豈徒保國祚實欲扶天常雲孫江州
牧思聖宮廟薦烝嘗豆籩孔嚴潔絲石載鏗鏘再拜久屏
息低徊想忠良作歌勸臣子百代踵遺芳

泊宮步門

人歸石城邊鳥沒白沙尾秋風涼蕭蕭波靜月如洗水
鳥栖不定半夜猶飛起

後買琴歌為鄧旭甫作


鄧敦好琴如好色十年買琴不可得南城縣裏客攜來
百鑑兼金君不惜竹林踞坐江盈盈臨江三奏魚龍聽
蕭森巖壑秋氣肅洶湧天地霜風清商聲洋洋羽聲苦
月墮寒光君罷撫餘音寄意愁人心別思蒼茫正如許
為余再控白玉絃長謠楚語招飛仙招飛仙安得見獨
立乾坤淚如霰

期馮祥甫不至

寒山壓樓三日雨風卷崩雲亞高樹山人無事不下樓

空谷寂寥誰與語平生故人大馮君約之不來歲聿暮
歲聿暮君何之側聞他日撫州去又恐促駕江東歸梅
花千樹化為雪寄贈惟有長相思

明詩綜卷四



總校官庶吉士臣張能照

校對官編修臣閔懋大

謄錄監生臣吳魯田